

049 靈真戒拔除生死濟苦經 (敦煌本)

經名：靈真戒拔除生死濟苦經。
又稱《天尊說濟苦經》。撰人不詳。底本出自敦煌 P.4559、S.793 抄本。參校本：敦煌 P.2385、北大 D117 抄本^①。

第一隱光道 第二處光道

第三隱相道 第四隱明道

第五隱真道 第六隱變道

第七普德道

天尊言曰：我窮乎無窮，極乎無極。我令隱光七道，歷化世間，觀察衆生，練其善惡。若男若女，能崇我法，精進信敬，行坐念道，恒持齋戒，着淨衣服，清淨之所晝夜燒香，依時禮拜，供養十方，行道吟詠，讚嘆諸聖，月直長齋，日日不闕。是人若遭病困，痛苦

無療，及在繫閉，並諸婦人，臨難不分，當爲讀此七道名字，叩請於我，我即尋聲將諸徒衆，乘空而來，徑赴是家，救拔病人，追其遊魂，令還本身，即得除愈。若在牢獄厄難之中，亦令枷杻解脫^②，若有〔婦人〕臨難^③，便得分解。復於宅中趕除^④穢惡，浮遊病鬼，魔耶魍魎，毒氣魍魎，無辜虛耗，駢馳遠去。呪咀蠱道，妬忌^⑤惡口，令還本主，動作觸犯，源其過有。我使侍童玉女，衛護此家，常居福慶，考命更延，少生益壽，衆善附身，萬惡消滅。一心奉行，自獲真道。

天尊言曰：我法行化，以爲信者，勤身受持，讀誦抄寫，如是弟子，恒圍衛我，愍其練行，能敬道法，爲除煩惱，終无枉橫，生无憂苦，死无殃流^⑥，去處无爲，常樂善緣，福獲自然，超越昇仙。

天尊言曰：我臣道士，是汝門師，受汝供養，爲汝授法，轉讀經文，過齋度戒，通傳我前，啓請精誠，我自知之，若不依法，我亦知之。汝等道民，好心供養，勿有侮慢，謗生口業，生施有悔，

死必无功，我當觀察，罪无兩主。直心取念，多施多得，少施少得，造經造像，亦復如是。及能安立觀廟^⑦，坐我形像，幡華圍繞，燃燈續明，施力成就，其功巍巍，計不可量，時登善福，得入昇仙。

天尊言曰：我道寬廓，無法不經，無物不度。若在胡國，稱之恒河沙諸佛；若在漢地，名曰太上老君。在胡在漢，止轉我身。阿難者，君喜先生身是；維摩詰者，無極先生身是；舍利弗者，鬼谷先生身是；文殊師利者，郭子先生身是。此等先生，隨我形變名位二處^⑧，恒從侍我，歷化還宮，得道合真。

天尊言曰：惟我先天地前，我獨有之，無生无滅，變易自然，有天地，始有君民，我出經教，歷帝爲師，復爲天真大神，府接^⑨蒼生。東化碧落，南化炎明，西化大堂，北化鬱單。化緣既遍，遷還常境，濟度十方，皆來奉道。未覩佛因，至心樂法，得入昇仙。

一者无極大道，二者无上正真之

道，三者太平無爲清約之道。

天尊言曰：此經一卷，日誦三遍，稱我三寶，鄣衛是人，令無怖畏，若有罪犯，亦復除滅。汝等敬信，「若」讀此經^①，口氣不淨，手捉穢惡，故汙不慎，未來染罪穢濁之中。若欲讀誦，必當漱口潔淨，持心正念，求男得男，求女得女，求長命得長命，居家安樂，衣食豐足。是經大有神德，濟度生死，若男若女，抄寫受持，清淨安置，即令宅舍安隱，男女昌熾，衆聖助衛，富樂無爲，福力之故。善行增廣，七世生天，法界有形，俱時^②斯福。

天尊說濟苦經一卷

①按本篇有敦煌抄本七件，均殘損。P.4559首題《靈真戒拔除生死濟苦經》；S.793、北大D117尾題《天尊說濟苦經》一卷；P.2385尾題《靈真戒拔除生死濟苦經》。經文與《正統道藏》所收《太上洞玄靈寶天尊說濟苦經》大致相同。本篇錄文，已將敦煌本部分異體俗字改作規範繁體字。

②以上文字以P.4559爲底本，以下用S.793爲底本。又「扭」字，S.793作「鍊」。

③「婦人」字原本缺損，據道藏本補。

④「趕除」，當作「驅除」。

⑤「妬忌」，當作「妒忌」。

⑥「殃流」，P.2385作「殃留」。

⑦「觀廟」，P.2385作「厝廟」。

⑧「二處」，P.2385作「一者」。

⑨「府接」，當作「俯接」。

⑩「若」字據P.2385補。道藏本此句作「汝等道民若讀此經」。

經」。

⑪「時」字，當從道藏本作「持」。

(王卡點校)